

四庫全書

集部

欽定四庫全書

詩話總龜後集卷二十五 宋 阮閱撰

儆法門

李商隱詠淮西碑云言訖屢領天子頤雖務竒崛人臣
言不當如此乘輿軒陛自不敢正斥如老杜天顏有
喜近臣知虬鬚似太宗可謂知體矣東坡贈寫御容
詩云野人不識日月角彷彿尚憶重瞳光天容誰能
畫老師古寺畫間房蓋遵此法

碧溪

杜牧之詩字意多用老杜如觀東兵長句云黑稍將軍
一鳥輕蓋用子美身輕一鳥過也遊樊川詩云野竹
疎還密巖泉咽復流蓋用子美小雨止還作斷雲疏
復行也蓋其心景仰之切則下語自然相符非有意
於蹈襲故其論杜詩云天外鳳凰誰得髓何人解合
續絃膠豈非自以爲得髓者耶東坡贈孔毅甫詩云
天下幾人學杜甫誰得其皮與其骨前生子美只君
是信手拈得俱天成學杜甫而得其皮骨者鮮矣又

況其髓哉

丹陽集

沈攸之晚好讀書手不釋卷嘗歎曰早知窮達有命恨
不十年讀書東坡再和劉景文介亭長篇云早知事
大繆恨不十年讀

碧溪

王元之到任表有全家飽煖盡荷君恩之語到今傳誦
永叔用爲詩云諸縣豐登少公事全家飽煖荷君恩
夢得亦嘗有云一生不得文章力百口空爲飽煖家
白云不才空飽煖無力及飢貧

同上

樂天云身閒當貴真天爵官散無憂即地仙蓋用顏蠋
晚食當肉早眠當富無事當貴也

臨川愛眉山雪詩能用韻如云水下寒魚漸可叉和云
羔袖龍鍾手獨叉蓋子厚嘗云江魚或共叉又云入
郡腰常折逢人手盡叉

黃常明

退之詠蚊蠅云涼風九月到埽不見踪跡夢得聚蚊云
清商一來秋日曉羞爾微形飼丹鳥聖俞云薨薨勿
久恃會有東方白王逢厚晝睡云蚊蟲交紛始誰造

一一口吻如針錐嚼人肌膚得腹飽不解默去猶鳴
飛雖然今尚爾無奈當有獵獵秋風時小人稔惡豈
漏恢網但可僥倖目前耳左氏曰天之假助不善非
佑之也將厚其惡而降之罰也其是之謂乎

同上

柳色黃金嫩梨花白雪香陰鏗詩也李太白取用之杜
子美太白詩云李侯有佳句往往似陰鏗後人以爲
以此譏之然子美詩有蛟龍得雲雨鵬鶚在秋天一
聯已見晉書載記矣如冰肌玉骨清無汗水殿風來

暗香滿孟蜀王詩東坡先生度以爲詞昔人不以蹈襲爲非南部烟花錄夕陽如有意偏傍小窓明唐人方域詩新唐書藝文志有方域詩一卷烟花錄一名大業拾遺記文詞極惡可疑而大業幸江都記自有詩一卷唐著作郎杜寶所纂明清有之永平時揚州印本也 揮麈錄

詩體如八音歌建除體之類古人賦詠多矣用十二神爲詩者始見於沈炯山谷亦嘗效爲之余友人莫之

用其祖馘嘗以辯舌說賊脫百人於死意其後必昌
而之用乃貧不能以自存天理殆難曉也余嘗以此
格作詩贈之云抱犬高眠已云足更得牛衣有餘燠
起來敗絮擁懸鶉誰羨龍髯織冰縠踏翻菜園底用
羊從他春雷吼枯腸擊鐘烹鼎莫渠愛小毛自詡猴
葵香半世飢寒孔移帶鼠米占來身漸泰吉雲神馬
日匝三擣捕肯作猪奴態虎頭食肉何足誇陰德由
來報宜奢丹竈功成無躍兔玉函方秘緣青蛇丹陽

集

坡有欲吐狂言喙三尺怕君瞋我却須吞嘗疑其語太怪及觀杜集亦有臨風欲慟哭聲出已復吞韋蘇州

高歌長安酒中憤不可吞

若溪

杜云卿到朝廷說老翁漂零已共滄浪客又朝覲從容問幽仄勿云江漢有垂綸其後夢得送陳郎中云若問舊人劉子政而今懶拙每如初送慧則云休公久別如相問楚客逢秋心更悲小杜江湖酒伴如相問

終老烟波不計程
交游問我憑君道
除却鱸魚更不聞
商隱寄崔侍御云
若向南臺見鶯友
爲言垂翅度春風
臨川舊人亦見如
相問爲道方尋水
雁編歸見江東諸
父老爲言飛鳥會
知還聖俞倘或無
忘問姓名爲言懶
拙皆如故東坡單
于若問君家世莫
道中朝第一人皆
有所因也

黃常明

韋應物詩擬陶淵明而作者甚多然終不近也
答長安丞裴說詩云臨流意已悽采菊露未晞
舉頭見秋山

萬事都若遺蓋效淵明采菊東籬下悠然見南山此
中有真意欲辨已忘言之句也然淵明解落世紛深
入理窟但見萬象森羅莫非真親故因見南山而真
意具焉應物乃因意悽而采菊因見秋山而遺萬事
具與陶所得異矣葛常之

茗溪云退之赤藤杖詩空堂晝眠倚戶牖飛電著壁搜
蛟螭故東坡鐵拄杖云入懷冰雪生秋思倚壁蛟龍
護晝眠山谷印竹杖贊涪翁晝寢蒼龍挂壁皆用退

之詩 君溪

杜云嗜酒狂嫌阮知非老笑遽近集有素書歎歎誰憐
杜彩筆適適獨勝江榻畔烟花常歎杜海中童丱尚
追徐河魚潰腹空號楚汗足流骹始信吳皆用此格
同上

西京雜記載司馬相如將聘茂陵人女爲妾卓文君作
白頭吟以自絕相如乃止樂府詩集謂白頭吟疾人
以新聞舊不能至白首故以爲名余觀張籍白頭吟

云春天百草秋始衰棄我不待白頭時羅襦玉珥色
未暗今朝已道不相宜李白白頭吟云妾有秦樓鏡
照心勝照井願持照新人雙對可憐影其語感人深
矣至劉希夷作白頭吟乃云寄言全盛紅顏子須憐
半死白頭翁此翁白頭真可憐伊昔紅顏美少年則
是言男為女所棄而作與文君白頭吟之本意異矣
韻語陽秋

老杜贈李秘書觸目非論故新文尚起予太白酬竇公

衡云曾無好事來相訪賴爾高文一起予韋蘇州每
一覩之子高詠尚起予昌黎酬張韶州將經貴郡煩
留客先惠高文謝起予豈非用事偶合數公非蹈襲
者

君溪

元白齊名有自來矣元微之寫白詩於閬州西寺白樂
天寫元詩百篇合為屏風更相傾慕如此樂天必言
微之詩得已格律頓進所謂每被老元偷格律是也
然微之江陵放言與送客嶺南詩樂天皆擬其作何

耶東坡嘗效山谷體作江字韻詩山谷謂坡收斂光芒入此窘步余於樂天亦云 丹陽集

仲長統云垂露成幃張霄成幄沆瀣當餐九陽代燭蓋取無情之物作有情用也自後竊取其意者甚多張志和則云太虛爲室明月爲燭王康琚則云華條當園屋翠葉代綺窓吳筠則云綠竹可充食女蘿可代裾劉伶則云日月爲扁牖八荒爲庭衢皆是意也李義山無題詩云春蠶到死絲方盡蠟燭成灰淚始乾

此又是一格今效此體爲俚語小詞傳於世者甚多
不足道也 丹陽集

皮日休雜體詩序曰詩云蟬螻在東又曰鴛鴦在梁雙
聲起於此也陸龜蒙詩序曰疊韻起自梁武帝云後
牖有朽柳當時侍從之臣皆唱和劉孝綽云梁王長
康強沈休文云載載每礙隸自後用此體作為小詩
者多矣如王融所謂園衡炫紅蘅湖行曄黃華溫庭
筠所謂棲息銷心象簷楹溢艷陽皆倣雙聲而爲之

者也陸龜蒙所謂瓊英輕明生竹石滴瀝碧皮日休
所謂康莊傷荒涼生虜部伍苦皆傲疊韻而爲之者
也南北朝人士多喜作雙聲疊韻如謝莊羊戎魏收
崔巖輩戲謔談諧之語往往載在史冊可得而攷焉

丹陽集

詩話總龜後集卷二十五

欽定四庫全書

集部

詩話總龜後集卷二十六至

詳校官侍郎 劉躍雲

主事銜臣徐以坤覆勘

總校官編修臣倉聖脉

校對官編修臣沈清藻

謄錄監生臣沈以顯

欽定四庫全書

詩話總龜後集卷二十六 宋 阮閱撰

節候門

徽宗宣和七年十二月二十一日勅睿謨殿張燈預賞
元宵曲宴近臣命左丞王安中中書侍郎馮熙載爲
詩以進安中云上帝通明闕神霄廣愛天九光環日
月五色麗雲烟紫袖開三極瓊瑱列萬仙希夷塵境
斷髮髯玉經傳妙道逢昌運真王撫髯賢龜圖規大

壯龍位正純乾宮昊親無間皇居綴自然剛風同變
化祥氣共陶甄層觀星潢上重闔斗柄邊摩空百雉
峻冠嶠六鼇連夢想何嘗到階升信有緣昕朝初放
仗密宴忽聞宣清禁來鳴佩修郎入並肩獸鋪金半
闔鸞障繡微褰霽景留庭砌雷文繪栢庭宮簾波錦
漾殿榜字金填花擁巍巍座香浮秩秩筵嵩呼稱萬
億韶奏侍三千華歲推堯歷元璣候舜璿冰霜知臘
後梅柳認春前造化應呈巧芳菲已鬪妍樛枝彫檻

小多葉露桃鮮錯落飛杯竿鏘洋雜管絃承雲歌歷
歷回雪舞翩翩黼幄祥氛合銅壺永漏延鎬京方置
醴羲馭自停鞭上聖情彌渥諸臣意更虔宗藩親魯
衛相帑拱闕顛側弁恩光泱中觴詔蹕旋寶熏攜滿
袖御果得加籩要賞嬉遊盛儀追步武遯騰身複道
表送日夾城孺仰挹蒼龍象旁臨艮嶽巔謳歌紛廣
陌簫鼓樂豐年赫奕攢輕幃珍奇集市廛博盧多袒
跣飲肆競踴躍蕃衍開朱邸崔嵬照彩椽橋虹彎矗

矗江練泮濺濺擊柝周廬晚張燈別院先餘霞搖綺
暈列宿合珠躔浩蕩三山島棱層十丈蓮再趨天北
極却立榻東偏既用家人禮仍占聖製篇兕觥從酌
酌蟾魄待嬋娟轉盼隨親指環觀得從穿曲屏紅浪
戲巨柱赤虬纏光透垂枝井晶銜帶壁錢蕭臺千級
峻重屋八窓全就席花整匝行樽紫袖揜交輝方爍
爍起立復聞聞邃宇會寧過中宵勝賞專鋪陳尤有
韻清雅不相沿戶箔明珠串欄缸水碧卷規模商甌

鉉歎識魯壺鐫秦曲移箏柱唐粧儼鬢蟬窄襟珠綴
領高朶翠為鈿喜氣排寒沍輕颼洗靜便層琳藉璣
組方鼎炷龍涎瑪瑙供盤大玻璃琢琰圓暖金傾小
榼屑玉釀新泉帝子天才異英姿棣萼聯頻看揮斗
盃端是吸鯨川推食俱均逮攘餐及墜捐海螯初破
殼江柱乍離淵寧數披綿雀休論縮頸鰻南珍誇釘
餽北饌厭烹煎賜橘懷顙卯酡顏醕寶船言歸荷慈
惠末節笑拘攣放鑰嚴局啓籠紗逸足牽冰輪挂銀

漢夜色映華驕人識重熙象功參獨斷權五辰今不
忒六氣永無愆天紀承三古時雍變八埏比閭增版
籍疆場罷戈鋌文軌包夷夏弦歌徧幅員恢儒榮藻
節作士極魚鳶慶胄貽謀顯多男景福縣迓衡常穆
穆遵路益平平亭障今踰隴耕耘久際燕信通鵬海
漲威竄犬戎羶東擬封雲岱西將款澗瀍琳科宣蕊
笈玉府下雲輶帝藉勤初播宮蠶長自眠繭絲登六
寢稂米秀中田廟祀垂昭格壇光監吉蠲靈芝滋菌

蠶甘醴湧潺湲合教龐風草頒經衆疾痊雨隨親禱
降河避上流遷執拜皇猷洽披圖福物駢太和輸橐
籥妙用絕蹄筌此際君臣悅應先簡冊編雅稱魚罩
罩頌述鼓咽咽詎比千齡遇猶聞四始箋羈臣起韋
布陋質愧駕鉛驟俾陪機政由來出眷憐恩方拜綸
綍報未効塵涓密席叨臨勸凡踪第曲拳雖無三峽
水曾步八花甌踰望知難稱非才合勉旃鈞天思盡
賦賸續白雲賡熙載云化工欲放陽春到先教元冥

戮衰草凝冰封地萬木僵誰向雪中探天巧璿璣星
回斗指寅羣芳未知時已春人心蕩漾趁佳節燈夕
獨冠年華新昇平萬里同文軌井邑相連通四裔蘭
膏競吐夜烘春和叔回車避羲轡巍巍九禁倚天開
溫風更覺先春來試燈不用雨花落迎陽爲却寒崔
嵬宣和初載元冬尾瑞白纔消塵不起穆清光賞屬
欽鄰錦繡雲龍頒宴喜初聞傳詔開睿謨步障幾里
承金鋪調音度曲三千女正似廣樂陳清都遏雲妙

唱韓娥侶回雪飛花稱獨步千春蟠木效紅英獻壽
當筵豈金母上林晚色烟謁輕景龍遊人歡笑聲霞
裾月佩擁仙仗翠鳳挾輦趨平成銅華金掌散晶彩
翠碧重重簇珠琲先從前殿望脩廊日出綺霞紅茜
海神光通透雲母屏驪龍出舞波濤驚煌煌黼座承
天命座下錯落如明星榻前玉案有核旅獸炭銀爐
夜初鼓憲天重屋訝雲屯崇道簫臺疑蜃吐前楹火
柱回萬牛蘭卿壁碎色光浮周圍照耀眼界徹冰壺

漾月生珠流點點金錢盡銜壁豹髓騰輝粲銀礫絲
篁人賴有機緘皦繹清音傳屋壁須臾隨蹕登會寧
如驂鸞鶴遊紫清彩蟾倒影上浮空纖雲不點惟光
明四壁垂簾圍煖玉銀缸吐艷相連屬棼楣橫帶碧
玻璃一朵翠雲承日轂萬光閃爍爭吐吞燭龍銜耀
輝西崑又如電母神鞭馳金蛇著壁不可捫端信奇
工通造化豈比胡人能幻假丹青漫數顧虎頭盤礴
解衣催客寫此時帝御鈞天臺紫垣兩兩明三台尚

方飲器萬金寶古玉未足誇雲雷帝旁侍女雲華品
玉立仙標及時韻四音促柱泛笙簫應有翔鸞落千
仞龍瓶瀉酒如流泉御厨絡繹紛珍鮮榻邊爭欲供
天笑快倒頗類鯨吸川厭厭夜飲方歡浹玉漏頻催
鼓三疊金門初下醉歸時正見冰輪上城堞微臣去
歲陪清班惡詩誤辱重瞳觀小才易窮真鼠技再賦
愈覺相如慳履道彥為二集中今不復印行故錄於
此

荆楚記云屈原以五月五日投汨羅而死人傷之以舟
楫拯焉故武陵競渡用五月五日蓋本諸此劉夢得
云今舉楫相和之音皆曰何在蓋所以招屈原也詩
曰湘江五月平隄流邑人相將浮彩舟靈均何在歌
已矣哀音振楫從此起又有招屈亭詩所謂曲終人
散空江暮招屈亭前水東注是也今江浙間競渡多
用春月疑非招屈之義及考沈佺期三月三日獨坐
驩州詩云誰念招魂節翻爲禦魅囚王績三月三日

賦亦云新開避忌之席更作招魂之所則以上已爲
招屈之時其必有所據也予觀琴操云介子推五月
五日焚林而死故是日不得發火而異苑以爲寒食
始禁烟蓋當時五月五日以周正言之耳今用夏正
乃三月也屈原以五月五日死而佺期王績以上已
爲招魂之節者亦豈是耶

歲時有祓除不祥之具而元日尤多如桃版葦索磔雞
之類是也飲屠蘇酒亦所以祓瘟穰惡而法必自幼

飲何耶顧況歲日口號云還丹寂寞羞明鏡手把屠
蘇先少年白樂天元日贈劉夢得詩亦云與君同甲
子歲酒合誰先元日飲酒則先卑而後尊自唐以來
已如此矣四時月令云進椒酒次第當從小起而董
勛告晉海西公曰小者得歲故先酒賀之老者失歲
故後與酒似亦不爲無理

並丹陽集

先文康公晚歲卜居於寶溪之上建觀禊堂於水濱紹
興癸丑與客汎舟修禊甚樂距永和癸丑不知其幾

癸丑也因與客相與推算自永和九年歲甲子一周
爲晉義熙九年又一周爲宋元徽元年自後梁大通
元年隋開皇十三年唐永徽四年開元元年大曆八
年太和七年景福二年周顯德二年本朝祥符六年
熙寧六年皆歲在癸丑凡七百八十年矣乃作詩以
紀其事云快雨霽亭午晴曦作春妍鄰曲饒勝士共
開浮水筵中流愜嘯詠隱浪金壺偏紅芰初出水捧
劍疑來前緬懷蘭亭會七百八十年可憐右軍癡生

死情纏綿由來彭殤齊顧或謂不然吾黨殆天放卜
夜就管絃尺六細腰女舞袖輕回旋且畢今日歡不
期來者傳同上

上巳日於流水上洗濯祓除去宿垢故謂之祓禊禊者
潔也王逸少作蘭亭叙云永和九年歲在癸丑會於
會稽山陰之蘭亭修禊事也當其羣賢畢集遊目騁
懷之際而感慨係之乃有一死生爲虛誕齊彭殤爲
妄作之語議者以此咎羲之之未達也同上

自冬至一百五日至寒食故世言寒食皆稱一百五杜
子美一百五日夜對月云無家對寒食有淚如金波
姚合寒食書事詩云今朝一百五出戶雨初晴則是
詩人例以百五日爲寒食也或者乃謂自冬至至清
明凡七氣至寒食止百五日殊不知歷家以餘分演
之也司馬彪續漢書云介子推焚林而死故寒食不
忍舉火至今有禁烟之說盧象所謂子推言避世山
火遂焚身四海同寒食千秋爲一人是也太原一郡

舊俗禁烟一月周舉為郡守以人多死移書惟祇禁
烟三日子美清明詩云朝來新火起又家人鑽火用
青楓皆在寒食三日之後則知禁烟止於三日也而
韓翃有寒食即事詩乃云春城無處不飛花寒食東
風御柳斜日暮漢宮傳蠟燭青烟散入五侯家不待
清明而已傳新火何耶元微之連昌宮詞云初過寒
食一百六店舍無烟宮樹綠念奴覓得又連催特勅
宮中許然燭一百六在清明前寒食之後是時店舍

已無烟而宮中然燭乃一時之權宜爾或云龍星木
之位也春屬東方心爲大火懼火盛故禁火是以寒
食有龍忌之禁則所謂禁烟又未必爲子推設也
同上

詩話總龜後集卷二十六

欽定四庫全書

詩話總龜後集卷二十七 宋 阮閱 撰

詠物門

杜集及馬與鷹甚多亦屢用屬對如老驥倦知道蒼鷹
飢易馴老驥思千里飢鷹待一呼老馬倦知道蒼鷹
飢著人驥病偏思秣鷹愁怕入籠放蹄知赤驥振翅
服蒼鷹老驥倦驤首飢鷹愁易馴驄馬行云吾聞良
驥老始成此馬數年人更驚又不比俗馬空多肉一

洗萬古凡馬空楊監出畫鷹云干戈少暇日真骨老
崖嶂為君除狡兔會見翻韉上王兵馬二角鷹云安
得汝輩皆其羣驅出六合梟鸞分畫鷹云何當擊凡
鳥毛血灑平蕪餘尚多有之蓋以壯心未甘伏櫪嫉
惡剛腸尤思排擊語曰驥不稱其力稱其德也左氏
曰見無禮於其君者如鷹鷂之逐鳥雀也少陵有焉
葛常之

周顥有云性命之在彼極切滋味之於我可除今人以

活鬻而資口腹者比比皆是也是誠何心哉或曰羊豕大身難於刳割蚶蛤微命易於烹熬如是則性命之小者尤不幸也鍾岢嘗告其師何子季曰車螯蚶蠓眉目內闕脣吻外絨不悴不榮曾草木之不若無聲無臭與瓦礫其何算故可長充庖厨永爲口實何其仁於大而忍於細歟山谷信佛甚篤而晚年酷好食蟹所謂寒蒲束縛十六輩已覺酒興生江山又云雖爲天上三辰次未免人間五鼎烹乃果於殺如此

何哉東坡在海南爲殺雞而作疏張乖崖在成都爲
刳羊而轉經豈愛物之仁不能勝口腹之欲耶山谷
談無碍禪蘇張行有爲法亦各其所見爾

永叔堪笑區區郊與島螢飛露濕吟秋草以爲二子之
窮子美亦有暗飛螢自照水宿鳥相呼幸因腐草出
敢近太陽飛雖吟詠微物曾無一點窮氣

臨川蕭蕭出屋千尋玉

竹也

靄靄當窓一炷雲

香也

皆

不名其物然子厚破額山前碧玉流

泉也

已有此格

近詩巖芽已作小兒拳退之已有初拳幾枝巖

竹未嘗香也而杜子美詩云雨洗娟娟淨風吹細細香
雪未嘗香也而李太白詩云瑤臺雪花數千點片片

吹落春風香

葛常之

韓退之雙鳥詩多不能曉或者謂其詩有不停兩鳥鳴
百物皆生愁不停兩鳥鳴大法失九疇周公不爲公
孔子不爲邱之句遂謂排釋老而作其實非也前云
一鳥落城市一鳥巢巖幽後云天公怪兩鳥各捉一

處囚則豈謂釋老耶余嘗觀東坡作李白畫像詩云
天人幾何同一漚謫仙非謫乃其游揮斤八極隘九
州化爲二鳥鳴相酬一鳴一息三千秋縻之不得矧
肯求且知所謂雙鳥者退之與孟郊輩爾所謂不停
兩鳥鳴等語乃實公告天之言甚其辭以譖二鳥爾
落城市退之自謂巢巖幽謂孟郊輩也各捉一處囚
非囚禁之囚止言韓孟各居天一方爾末云還當三
千秋更起鳴相酬謂賢者不當終否當有行其言者

同上

本事云鮑當孤鴈詩云更無聲接續空有影相隨孤則孤矣豈若子美孤鴈不飲啄飛鳴尤念羣誰憐一片影相失萬重雲有不盡之意乎

同上

王誼伯謂西川有杜鵑東川無杜鵑蓋是題下注斷自我昔遊錦城為句首子瞻謂杜備諸家體非必牽合程度詩意蓋譏當時刺史有禽鳥不若者明皇以後天步多棘凡尊君者為有也懷貳者為無也魯直亦

云臣結春秋二三策臣甫杜宇再拜詩忠臣銜憤痛
切骨後世但識瓊瑰辭今觀此篇叙鴻鴈羔羊禮自
太古尊君親上之意為明皇設不疑至於杜鵑行乃
云雖同君臣有舊禮骨肉滿眼身羈孤又云爾惟摧
殘始發憤羞帶羽翮傷形愚指斥罵詈殊無致嚴之
語莫不皆有所主也

黃常明

東坡南都王誼伯書江濱驛垣謂子美詩歷五季兵火
多舛缺奇異雖經其祖父所理尚有疑闕者誼謂西

川有杜鵑東川無杜鵑涪萬無杜鵑雲安有杜鵑蓋
是題下注斷自我昔遊錦城為首句誼伯悞矣且子
美詩備諸家體非必牽合程度品品者然也是篇句
處凡五杜鵑豈可以文害辭辭害意耶原子美之意
類有所感託物以發者也亦六義之比興離騷之法
與按博物志杜鵑生子寄之他巢百鳥為飼之故江
東所謂杜宇曾為蜀帝王化禽飛去舊城荒且禽鳥
之微有識故子美詩云重是古帝魂又曰禮若奉至

尊子美蓋譏當時刺史有不禽鳥若也唐自明皇以後天步多棘刺史能不忘君可得而考也嚴武在蜀雖橫斂刻薄而實資中原是西川有杜鵑耳其不虔王命負固以自抗擅軍旅絕貢賦如杜克遜在梓州爲朝廷西顧之憂是東川無杜鵑耳至於涪萬雲安刺史微不可考凡尊君者爲有也懷貳者爲無也不在夫杜鵑真有無誼伯以爲來東川聞杜宇聲乃始疑子美跋扈紙上語又云子美不應疊用韻子美自

我作古疊用韻無害於詩僕所見如此誼伯博學強
辯殆必有以折中之

石溪

花卿歌云用如快鶻風火生南史曹景宗謂所親曰昔
在鄉里與少年輩拓弓弦作霹靂聲箭如餓鶻叫覺
耳後生風鼻尖出火子美蓋不拘泥於鶻鶻之異也

黃常明

柳子厚牡丹曰歆紅醉濃露窈窕留餘春坡云殷勤木
芍藥獨自殿餘春留與殿重輕雖異各有宜也

楊中立梅詩云欲驅殘臘變春風只有寒梅作選鋒頗
恨不與殿軍商確正一的對同上

西湖浮動橫斜之句最爲前輩擊節常恨未見全篇得
其集觀之云衆芳搖落獨暄妍占盡風情向小園踈
影橫斜水清淺暗香浮動月黃昏霜禽欲下先偷眼
粉蝶如知合斷魂幸有微吟可相狎不須檀板共金
樽其卓絕不可及專在十四字耳又有七言數篇皆
無如池水倒窺踈影動屋簷斜入一枝低雪後園林

纔半樹水邊籬落忽橫枝之句

君溪

千里蓴羹未下鹽豉蓋言未受和耳子美豉化蓴絲熟
又豉添蓴菜紫聖俞送人秀州刺將鹽豉煮紫蓴魯
直鹽豉欲催蓴菜熟

同上

巴峽中有吐綬雞比常雞差大喙藏肉綬長闊幾數尺
紅碧相間極煥爛常時不見遇晴日則向陽擺之頂
首先出兩肉角亦二寸許然後徐舒其綬逾時乃斂
李文饒詩所謂歲蕤散綬輕風裏若銜若垂何可擬

是也文饒云出剡溪今詢之越人不復有予嘗自峽中攜至蘇州人皆不識則知山川風氣所產古今亦有不同也

蔡寬夫詩話

真珠雞生夔峽山中畜之甚馴以其羽毛有白圓點故號真珠雞又名吐綬雞生而反哺亦名孝雉每至春夏之交景氣和煖頷下出綬帶方尺餘紅碧鮮然頭有翠角雙立良久悉斂於喙下披其毛不復見或有死者割其頸臆間亦無所覩茗溪漁隱曰廣右閩中

亦有吐綬雞余在二處見人多養之不獨巴峽中有
也王荆公有絕句云樊籠寄食老低摧組麗深藏肯
自媒天日清明聊一吐兒童初見互驚猜

倦游錄

李衛公詩云五月畬田收火米三更津吏報朝雞頗似
少陵句王荆公詩云紛紛易變浮雲白落落難鍾老
柏青山谷蟹詩云已標天上三辰次未免人間五鼎
烹此皆得老杜句法

雪浪齋日記

唐故事中書省植紫薇花歷世循用之不以為非至今

舍人院紫薇閣前植紫薇花用故事也樂天詩云獨坐黃昏誰是伴紫薇花對紫薇郎按天文志紫薇大帝之座也天子之常居也主命主度也何關紫薇花事

湘素雜錄

嘗見曲中使柳三眠事不知所出後讀玉溪生江之嫺賦云豈如河畔牛星隔歲止聞一過不比苑中人柳終朝刺得三眠注云漢苑中有柳狀如人形號曰人柳一日三起三倒

漫叟詩話

玉溪生牡丹詩錦帳佳人乃越絕書中事退之燈花詩
全似老杜所用黃裏事見前漢黃屋注中荆公詩曰
溪邊飲啄白浮鳩浮鳩出晉志

雪浪齋日記

牧之和裴傑新櫻桃詩云忍用烹騂酪從將玩玉盤流
年如可住何必九華丹唐人已用櫻桃薦酪也茗溪
漁隱曰撫言載唐新進士尤重櫻桃宴劉蕡及第大
會公卿和以糖酪用享人獻一小盤則唐人用櫻桃
薦酪此事又可驗矣

高齋詩話

老杜櫻桃詩云西蜀櫻桃也自紅野人相贈滿筠籠數
回細寫愁仍破萬顆勻圓訝許同此詩如禪家所謂
信手拈來頭頭是道者直書目前所見平易委曲得
人心所同然但他人艱難不能發耳至於憶昨賜霑
門下省退朝擎出大明宮金盤玉箸無消息此日嘗
新任轉蓬其感興皆出於自然故終篇道麗韓退之
有賜櫻桃詩云漢家舊種明光殿炎帝還書本草經
豈似滿朝承雨露共看轉賜出青冥香隨翠籠擎偏

重色照銀盤寫未停食罷自知無補報空然慙汗仰
皇局蓋學老杜前詩然搜求事跡排比對偶其言出
於勉強所以相去甚遠若非老杜在前人亦安敢輕

議詩眼

溫庭筠小詩尤工如牆高蝶過遲又蝶翎胡粉重鴉背
夕陽多又過蘇武廟詩云歸日樓臺非甲帳去時冠
劍是丁年

雪浪齋日記

溫飛卿晚春曲云家臨長信往來道乳燕雙雙拂烟草

油壁車輕金犢肥流蘇帳曉春雞報籠中嬌鳥煖猶
睡簾外落花閒不掃衰桃一樹近前池似惜容顏鏡
中老殊有富貴佳致也

茗溪漁隱

韓偓詩云鶯兒啼曉雌黃紫鳳子輕盈膩粉腰事見崔
豹古今注云蛺蝶大者為鳳子

西清詩話

傳道嘗於彭門壁間見書一聯云一鳩鳴午寂雙燕話
春愁後以語東坡且謂公然否坡笑曰此唐人得意
句僕安能道此茗溪漁隱曰余嘗用此語作春日一

聯云話盡春愁雙紫燕喚回午夢一黃鸝

同上

陳恭公執中以衛尉寺丞知梧州驛遞上疏乞立儲貳
真宗嘉其敢言翌日臨朝袖其疏以示執政歎獎久之
召爲右正言然爲王冀公所忌一日真宗賦御溝
柳詩宣示宰相兩省皆和進恭公因進詩曰一度春
來一度新翠光長得照龍津君王自愛天然色恨殺

昭陽學舞人

東軒筆錄

紅梅清艷兩絕昔獨盛於姑蘇晏元獻始移植西岡第

中特珍賞之一日賈游賂園吏得一枝分接由是都下有二本公嘗與客飲花下賦詩曰若更遲開三二月北人應作杏花看客曰公詩固佳特比擬何淺也公笑曰顧滄父安得不然一坐絕倒王君玉聞盜花事以詩遺公云館娃宮裏舊精神粉瘦瓊寒露蕊新園吏無端偷折去鳳城從此有雙身自爾名園事培接遍都城矣茗溪漁隱曰王介甫紅梅詩云春半花纔發多應不奈寒北人初未識渾作杏花看與元獻

之詩暗合然介甫句意俱工勝元獻遠矣

西清

詩話總龜後集卷二十七

欽定四庫全書

詩話總龜後集卷二十八 宋 阮閱 撰

詠物門

歐陽文忠公極賞林和靖疎影橫斜水清淺暗香浮動
月黃昏之句而不知和靖別有詠梅一聯云雪後園
林纔半樹水邊籬落忽橫枝似勝前句不知文忠何
緣棄此而賞彼文章大槩亦如女色好惡止繫於人
君溪漁隱曰王直方又愛和靖池水倒窺疎影動屋

簷斜入一枝低以謂此句於前所稱真可處伯仲之間余觀此句畧無佳處直方何爲喜之真所謂一蟹不如一蟹也

山谷

爲詩當飽參然後臭味乃同雖爲大宗匠者亦然月觀橫枝之語乃何遜之妙處也自林和靖一參之後參之者甚多

雪浪齋日記

唐人牡丹詩云紅開西子粧樓曉翠揭麻姑水殿春若改春作秋全是蓮花詩林和靖梅花詩云疎影橫斜

水清淺暗香浮動月黃昏近似野薔薇也

陳輔之詩

話

凡詠梅多詠白而荆公詩獨云鬚撚黃金危欲墮蒂團
紅蠟巧能粧不惟造語巧麗可謂能道人不到處矣
又東坡詠梅一句云竹外一枝斜更好語雖平易然
頗得梅之幽獨閒靜之趣凡詩之詠物雖平淡巧麗
不同要能以隨意造語爲工荆公後復有詩云遙知
不是雪爲有暗香來蓋取蘇子卿云只言花似雪不

悟暗香來之意公在金陵又有和徐仲輦文字韻梅
詩二首東坡在嶺南有暲字韻梅詩三首皆韻險而
語工非大手筆不能作也

遜齋閒覽

驛使前時走馬回北人從識越人梅清香莫把酴醾比
只欠溪邊月下杯此梅二丈京師逢賣梅花絕句吾
隨後輩猶及與之周旋覽其親書如見其抵掌談笑
也

東坡

韓持國雖剛果特立風節凜然而情致風流絕出時輩

許昌崔象之侍郎舊第今為杜君章所有廳後小亭
僅丈餘有海棠兩株持國每花開輒載酒日飲其下
竟謝而去歲以爲常至今故吏猶能言之余嘗於小
亭柱間得公二絕句其一云濯錦江頭千萬枝當年
未解惜芳菲而今得向君家見不怕春寒雨濕衣尚
可想見當時氣味韓忠獻公嘗帥蜀持國兄弟皆侍
行尚少故前句云爾其二云長條無風亦自動柔艷
著雨更相宜漫其後句若溪漁隱曰鄭谷海棠詩云

穠麗最宜新著雨妖嬈全在欲開時前輩以謂此兩句說盡海棠好處今持國柔艷著雨更相宜之句乃用鄭谷語也至於東坡作此詩則詞格超逸不復蹈襲前人其詩有嫣然一笑竹籬間桃李漫山總粗俗自然富貴出天姿不待金盤薦華屋朱脣得酒暈生臉翠袖卷紗紅映肉林深霧暗曉光遲日暖風輕春睡足雨中有淚亦悽愴月下無人更清淑元豐間東坡謫黃州寓定惠院院之東小山上海棠一株特

繁茂每歲盛開時必爲攜客置酒已五醉其下矣故
作此長篇平生喜爲人寫蓋人間刊石者自有五六
本云軾平生得意詩也

石林詩話

隱居詩話云呂士隆知宣州好以事答官妓妓皆欲逃
籍而未能也會杭州有一妓到宣其色藝可取士隆
喜之留之使不去一日郡妓復犯小過士隆又欲答
之妓泣訴曰某不敢辭罪但恐杭妓不能安也士隆
愍而捨之聖俞因作莫打鴨一篇曰莫打鴨打鴨驚

鴛鴦鴛鴦新向池邊浴不比孤洲老禿鶻禿鶻尚欲
遠飛去何況鴛鴦羽翼長蓋謂此也

詠物詩不待分明說盡只彷彿形容便見妙處如魯直
醪醑詩云露濕何郎試湯餅日烘荀令炷爐香義山
雨詩云撼撼度瓜園依依傍水軒此不待說雨自然
知是雨也後來魯直無已諸人多用此體

訓

茗溪漁隱曰裴璘詠白牡丹詩云長安豪貴惜春殘爭

賞先開紫牡丹別有玉杯承露冷無人起就月中看
時稱絕唱以余觀之語句凡近不若胡武平詠白牡
丹詩云壁堂月冷難成寐翠幄風多不奈寒其語意
清勝過裴璘遠矣如皮日休詠白蓮詩云無情有恨
何人見月冷風清欲墮時若移作詠白牡丹詩有何
不可語更清切耳曼卿詠小桃二絕句云生色深紅
綬帶長宮簾寒在井欄香母家升上瑤池品先得春
風一面妝本分桃花寒食前小桃長是上春天二喬

二趙俱傾國女弟嬌彊意自先其模寫命意豈不佳哉

王直方詩話云或有稱詠松句云影搖千尺龍蛇動聲撼半天風雨寒者一僧在坐曰未若雲影亂鋪地濤聲寒在空或以語聖俞聖俞曰言簡而意不遺當以僧語爲優

詩話總龜後集卷二十八

欽定四庫全書

集部

詩話總龜後集卷

二十九至
三十一

詳校官侍郎_臣劉躍雲

主事銜_臣徐以坤覆勘

總校官編修_臣倉聖脉

校對官中書_臣李斯咏

謄錄監生_臣陳觀龍

欽定四庫全書

詩話總龜後集卷二十九 宋 阮閱 撰

詠茶門

庫部林郎中說建州上春採茶時茶園人無數擊鼓聲
聞數里然一園中纔間壟茶品已相遠又況山園之
異耶茗溪漁隱曰歐陽永叔嘗新茶詩云年窮臘盡
春欲動蟄雷未起驅龍蛇夜間擊鼓滿山谷千人助
叫聲喊呀萬木寒癡睡不醒惟有此樹先萌芽余官

富沙凡三春備見北苑造茶但其地暖纔驚蟄茶芽
長已寸許初無擊鼓喊山之事永叔詩與文昌所紀
皆非也北苑茶山凡十四五里茶味惟均亦豈有間
壟茶品已相遠之說耶

歐公和劉原父揚州時會堂絕句云積雪猶封蒙頂樹
驚雷未發建溪春中州地暖萌芽早入貢宜先百物
新注云時會堂造貢茶所也余以陸羽茶經考之不
言揚州出茶惟毛文錫茶譜云揚州禪智寺隋之故

宮寺枕蜀岡其茶甘香味如蒙頂焉第不知入貢之
因起於何時故不得而誌之也 茗溪漁隱

東坡汲江水煎茶詩云活水還須活火烹自臨釣石取
深清大瓢貯月歸春甕小杓分江入夜瓶此詩奇甚
道盡烹茶之要且茶非活水則不能發其鮮馥東坡
深知此理矣余頃在富沙嘗汲溪水烹茶色香味俱
成三絕又況其地產茶爲天下第一宜其水異於他
處用以烹茶水功倍之至於浣衣尤更潔白則水之

輕清益可知矣近城山間有陸羽井水亦清甘實好事者爲名之羽著經言建州茶未得詳則知羽不曾至富沙也

同上

建安北苑茶始於太宗太平興國二年遣使造之取象於龍鳳以別庶幾由此入貢至道間仍添造石乳其後大小龍茶又起於丁謂而成於蔡君謨謂之轉漕閩中實董其事賦北苑焙新茶詩其序云產茶者將七十郡每歲入貢皆以社前火前爲名悉無其實惟

建州出茶有焙焙有三十六三十六中惟北苑先發
而味尤佳社前十五日即採其芽日數千工聚而造
之逼社即入貢工甚大造甚精皆載於所撰建安茶
錄仍作詩以大其事云北苑龍茶者甘鮮的是珍四
方惟數此萬物更無新纔吐微茫綠初沾少許春散
尋縈樹遍急採上山頻宿葉寒猶在芳芽冷未伸持
將溪口焙役用雨中民長疾勾萌拆開齊分兩均帶
烟蒸雀舌和露疊龍鱗貢作勝諸道先嘗祇一人緘

封瞻闕下郵傳渡江濱特旨留丹禁殊恩賜近臣啜
宜靈藥助用與上樽親頭進英華盡初烹氣味醇細
香勝却麝淺色過於筠顧渚慙投木宜都愧積新年
年號供御天產壯甌閩此詩叙貢茶頗爲詳盡亦可
見當時之事也又君謨茶錄序云臣前因奏事伏蒙
陛下諭臣先任福建轉運使日所進上品龍茶最爲
精好臣退念草木之微首辱陛下知鑒若處之得地
則能盡其材昔陸羽茶經不第建安之品丁謂茶圖

獨論採造之事至於烹試曾未有聞輒條數字簡而易明勒成二篇名曰茶錄至宣政間鄭可簡以貢茶進用久領漕使創添續入其數浸廣今猶因之細色茶五綱凡四十三品形製各異共七千餘餅其間貢新試新龍團勝雪白茶御苑玉芽此五品乃水揀爲第一餘乃生揀次之又有粗色茶七綱凡五品大小龍鳳并揀芽悉入龍腦和膏爲團餅茶共四萬餘餅東坡題汶公詩卷云上人問我留連意待賜頭綱八

品茶即今粗色紅絹袋八品者是也蓋水揀茶即社前者生揀茶即火前者粗色茶即雨前者閩中地暖雨則茶已老而味加重矣山谷和楊王休點密雲龍詩云小璧雲龍不入香元豐龍焙承詔作今細色茶中却無此一品也又有石門乳吉香口三外焙亦隸於北苑皆採摘茶芽送官焙添造每歲糜金共二萬餘緡日役千夫凡兩月方能訖事第所造之茶不許過數入貢之後市無貨者人所罕得惟壑源諸處私

焙茶其絕品亦可敵官焙自昔至今亦皆入貢其流
販四方悉私焙茶耳蘇黃皆有詩稱道壑源茶蓋壑
源與北苑爲鄰山阜相接才三里餘其茶甘香特在
諸私焙之上東坡和曹輔寄壑源試焙新芽詩云仙
山靈雨濕行雲洗遍香肌粉未勻明月來投玉川子
清風吹散武林春要知玉雪心腸好不是膏油首面
新戲作小詩君一笑從來佳茗似佳人山谷謝送碾
賜壑源揀芽詩云喬雲從龍小蒼壁元豐至今人未

識壑源包貢第一春御奩碾香俱玉食
睿思殿中金井欄甘露薦枕天開顏
橋山事嚴庀百局衮司諸公省中宿
中人傳賜夜未央雨露恩光照宮燭
右丞似是李元禮好事風流有涇渭
肯憐天祿校書郎親敕家庭遣分惠
春風飽食大官羊不慣腐儒湯餅腸
搜攪十年燈火讀令我胸中書傳香
已戒應門老馬走客來問字莫載酒

茗溪漁隱

建州陸羽茶經尚未知之但言福建等十二州未詳往

往得之其味極佳江右近日方有蠟面之號李氏別
令取其乳作片或號曰京挺的乳及骨子等每歲不
過五六萬斤迄今歲出三十餘萬斤凡十品曰龍茶
鳳茶京挺的乳石乳白乳頭金蠟面頭骨次骨龍茶
以供乘輿及賜執政親王長主餘皇族學士將帥皆
得鳳茶舍人近臣賜京挺的乳館閣賜白乳龍鳳石
乳茶皆太宗令造江右有研膏茶供御即龍茶之品
也丁謂為北苑茶錄三卷備載造茶之妙未行於世

談苑

唐茶惟湖州紫筍入貢每歲以清明日貢到先薦宗廟
然後分賜近臣紫筍生顧渚在湖常二境之間當採
茶時兩郡守畢至最爲盛集此蔡寬夫詩話之言也
蔡但知其一而不知其二按陸羽茶經云浙西以湖
州上常州次湖州生長城縣顧渚山中常州生義興
縣君山懸腳嶺北峯下唐義興縣重修茶舍記云義
興貢茶非舊也前此故御史大夫李栖筠實典是邦

山僧有獻佳茗者會客嘗之野人陸羽以爲芬香甘
辣冠於他境可薦於上栖筠從之始進萬兩此其濫
觴也厥後因之徵獻浸廣遂爲任土之貢與常賦之
邦侔矣故玉川子詩云天子須嘗陽羨茶百草不敢
先開花正謂是也當時顧渚義興皆貢茶又鄰壤相
接白樂天守姑蘇聞賈常州崔湖州茶山境會想羨
歡宴因寄詩云遙聞境會茶山夜珠翠歌鍾俱遶身
盤下中分兩州界燈前合作一家春青娥遞舞應爭

妙紫筍齊嘗各鬪新自歎花時北窓下蒲黃酒對病
眠人唐袁高為湖州刺史因修貢顧渚茶山作詩云
禹貢通遠俗始圖在安人後王失其本職吏不敢陳
亦有姦佞者因茲欲求伸動生千金費日使萬姓貧
我來顧渚源得與茶事親黎氓輟耕農採掇實苦辛
一夫且當役盡室皆同臻捫葛上欹壁蓬頭入荒榛
終朝不盈掬手足皆鱗皴悲嗟遍空山草木為不春
陰嶺芽未吐使曹牒已頻心爭造化先走鋌麋鹿均

選納無日夜擣聲昏繫晨衆功何拮据俯視彌傷神
皇帝尚巡狩東郊路多堙周回繞天涯所獻惟艱勤
况減兵草用兼茲困疲民未知供御餘誰合分此珍
顧省忝邦守有慙復因循茫茫滄海間丹憤何由申
此詩雅得詩人諷諫之體誠可尚也

茗溪漁隱

王川子有謝孟諫議惠茶歌范希文亦有鬪茶歌此二
篇皆佳作也殆未可以優劣論然王川歌云至尊之
餘合王公何事便到山人家而希文云北苑將期獻

天子林下雄豪先鬪美若論先後之序則玉川之言
差勝雖然如希文豈不知上下之分者哉亦各賦一
時之事耳茗溪漁隱曰藝苑以此二篇皆佳作未可
優劣論今並全錄余謂玉川之詩優於希文之歌玉
川自出胸臆造語穩貼得詩人之句法希文排比故
實巧欲形容宛成有韻之文是果無優劣耶玉川走
筆謝孟諫議寄新茶云日高丈五睡正濃軍將打門
驚周公傳云諫議送書信白絹斜封三道印開緘宛

見諫議面手聞月團三百片聞道新年入山裏蟄蟲
驚動春風起天子須嘗陽羨茶百草不敢先開花仁
風暗結珠琲瑠先春抽出黃金芽摘鮮焙芳旋封裹
至精至好且不奢至尊之餘合王公何當便到山人
家柴門反關無俗客紗帽挂頭自煎啐碧雲引風吹
不斷白花浮光凝碗面一碗喉吻潤兩碗破孤悶三
碗搜枯腸惟有文字五千卷四碗發輕汗平生不平
事盡向毛孔散五碗肌骨清六碗通仙靈七碗啐不

得也惟覺兩腋習習清風生蓬萊山在何處玉川子
乘此清風欲歸去山上羣仙司下土地位清高隔風
雨安得知百萬億蒼生命墮在巔崖受辛苦便為諫
議問蒼生到頭合得蘇息否希文和章岷從事鬪茶
歌云年年春自東南來建溪先暖水微開溪邊竒茗
冠天下武夷仙人從古栽新雷昨夜發何處家家嬉
笑穿雲去露芽錯落一番榮綴玉含珠散嘉樹終朝
採掇未盈簷惟求精粹不敢貪研膏焙乳有雅製方

中圭兮圓中蟾北苑將期獻天子林下雄豪先鬪美
鼎磨雲外首山銅瓶攜江上中濡水黃金碾畔綠塵
飛碧玉甌中翠濤起鬪茶味兮輕醞鬪茶香兮薄
蘭芷其間品第胡能欺十目視而十手指勝若登山
不可扳輸同降將無窮恥吁嗟天產石上英論功不
愧階前奠衆人之濁我可清千日之醉我可醒屈原
試與招魂魄劉伶却得聞雷霆盧仝敢不歌陸羽須
作經森然萬象中焉知無茶星商山老人休茹芝首

陽先生休采薇長安酒價減千萬成都藥市無光暉
不如仙山一啜好冷然便欲乘風飛君莫羨花間女
郎只鬪草嬴得珠璣滿斗歸

詩話總龜後集卷二十九

欽定四庫全書

詩話總龜後集卷三十 宋 阮閱 撰

詠茶門

趙德麟著因話錄載其家兵部君性尤嗜茶能自煎謂
人曰茶須緩火灸活水煎坡有活水還須活火烹恐
亦用此 黃常明

五代時鄭遨茶詩云嫩芽香且靈吾謂草中英夜臼和
烟搗寒爐對雪烹維憂碧粉散常見綠花生最是堪

珍重能令睡思清范文正公詩云黃金碾畔綠塵飛
碧玉甌中翠濤起茶色以白爲貴二公皆以碧綠言
之何邪 三山老人語錄

茶之佳品造在社前其次則火前謂寒食前也其下則
雨前謂穀雨前也佳品其色白若碧綠者乃常品也
茶之佳品芽蘗細微不可多得若此數多者皆常品
也茶之佳品皆點啜之其煎啜之者皆常品也齊己
茶詩曰甘傳天下口貴占火前名又曰高人愛惜藏

巖裏白甌封題寄火前丁謂茶詩曰開緘試新火須
汲遠山泉凡此皆言火前蓋未知社前之品為佳也
鄭谷茶詩曰入坐半甌輕泛綠開緘數片淺含香鄭
雲叟茶詩曰維憂碧粉散常見綠花生沈存中論茶
謂黃金碾畔綠塵飛碧玉甌中翠濤起宜改綠為玉
翠為素此論可也而舉一夜風吹一寸長之句以為
茶之精美不必以雀舌鳥觜為貴今按茶至於一寸
長則其芽葉大矣非佳品也存中此論曲矣盧仝茶

詩曰開緘宛見諫議面手閱月團三百片薛能謝劉
相公寄茶詩曰兩串春團敵夜光名題天柱印維揚
茶之佳品珍踰金玉未易多得而以三百片惠盧全
以兩串寄薛能者皆下品可知也齊己詩角開香滿
室爐動綠凝鐺丁謂詩曰芽細烹還好鐺新味更全
此皆煎啜之也煎啜之者非佳品矣唐人於茶雖有
陸羽爲之說而評論未精至本朝蔡君謨茶錄既行
則持論精矣以茶錄而覈前賢之詩皆未知佳味者

也同上

唐以前茶惟貴蜀中所產孫楚歌云茶出巴蜀張孟陽
登成都樓詩云芳茶冠六清溢味播九區他處未見
稱者唐茶品雖多亦以蜀茶為重然惟湖州紫筍入
貢每歲以清明日貢到先薦宗廟然後分賜近臣紫
筍生顧渚在湖常二境之間當採茶時兩郡守畢至
最為盛會杜牧詩所謂溪盡停蠻棹旗張卓翠苔柳
村穿窈窕桃澗渡喧飀劉禹錫何處人間似仙境春

山攜妓採茶時皆以此建茶絕無貴者僅得挂一名
爾至南唐李氏時漸見貴始有團圞之製而造作之
精經丁晉公始大備自建茶出天下所產皆不復可
數今其處壑源沙溪土地相去丈尺之間品味已不
同謂之外焙況他處乎則知雖草木之微其顯晦亦
自有時然唐自常袞以前閩中未有讀書者自袞教
之而歐陽詹之徒始出而終唐世亦不甚盛今閩中
舉子常數倍天下而朝廷將相公卿每居十四五人

物尚爾况草木微物也顧渚湧金泉每造茶時太守
先祭拜然後水漸出造貢茶畢水稍減至供堂茶畢
已減半太守茶畢遂涸蓋常時無水也或聞今龍焙
泉亦然茗溪漁隱曰北苑官焙也漕司歲以入貢茶
爲上壑源私焙也土人亦入貢茶爲次二焙相去三
四里間若沙溪外焙也與二焙相去絕遠自隔一溪
茶爲下山谷詩云莫遣沙溪來亂真正謂此也官焙
造茶常在驚蟄後一二日興工採摘是時茶芽已皆

一槍蓋閩中地暖如此舊讀歐公詩有喊山之說亦傳聞之訛耳龍焙泉即御泉也水之增減亦隨水旱初無漸出遂涸之異但泉水極甘正宜造茶耳

蔡寬

夫詩話

蜀中數處產茶雅州蒙頂最佳其生最晚在春夏之交其地即書所謂蔡蒙旅平者也方茶之生雲霧覆其上若有神物護持之

東齋紀事

茶古不著所出本草云出益州唐以蒙山顧渚斬門者

爲上品尚雜以蘇椒之類故李泌詩云旋沫翻成碧玉池添蘇散出琉璃眼遂以碧色爲貴止曰煎茶不知點試之妙大率皆草茶也陸羽茶經統言福建泉紹等十州所出者其味極佳而只今建安爲天下第一
一 遊齋閒覽

鄭可簡以貢茶進用累官職至觀文殿修撰福建路轉運使其姪千里於山谷間得朱草可簡令其子待問進之因此得官好事者作詩云父貴因茶白兒榮爲

草朱而千里以從父奪朱草以予子諂諂不已待問
得官而歸盛集為慶親姻畢集衆皆贊喜可簡云一
門僥倖其姪遽云千里埋冤衆皆以為的對是時貢
茶一方騷動故也茗溪漁隱曰余觀東坡荔支歎注
云大小龍茶始於丁晉公而成於蔡君謨歐陽永叔
聞君謨進小龍團驚歎曰君謨士人也何至作此事
今年閩中監司乞進鬪茶許之故其詩云武夷溪邊
栗粒芽前丁後蔡相籠加爭新買寵各出意今年鬪

品充官茶則知始作俑者大可罪也 高齋詩話

詩云誰謂荼苦爾雅云檟苦茶注樹似梔子今呼早采者爲茶晚采者爲茗一名薺蜀人名爲苦茶故東坡乞茶栽詩云周詩記苦茶茗飲出近世初緣厭梁肉假此雪昏滯蓋謂是也六一居士嘗新茶詩云泉甘器潔天色好坐中揀擇客亦佳東坡守維揚於石塔寺試茶詩云禪窓麗午景蜀井出冰雪坐客皆可人鼎器手自潔正謂諺云三不點也 茗溪漁隱

葉濤詩極不工而喜賦詠嘗有試茶詩云碾成天上龍
兼鳳煮出人間蟹與蝦好事者戲云此非試茶乃碾

玉匠人嘗南食也

西清詩話

唐相李衛公好飲惠山泉置驛傳送不遠數千里而近
世歐陽少師作龍茶錄序稱嘉祐七年親享明堂致
齋之夕始以小團分賜二府又給一餅不敢碾試至
今藏之時熙寧元年也吾聞茶不問團餅要之貴新
水不問江井要之貴活千里致水真偽固不可知縱

令識真已非活水自嘉祐七年壬寅至熙寧元年戊申首尾七年更閱三朝而賜茶猶在此豈復有茶也哉茗溪漁隱曰壬午之春余赴官閩中漕幕遂得至北苑觀造貢茶其最精即冰芽細如針用御泉水研造社前已嘗貢餘每片計工直四萬錢分試其色如乳平生未嘗嘗啜此好茶亦未嘗嘗茶如此之早也

唐子西園茶記

魯直諸茶詞余謂品令一詞最佳能道人所不能言尤

在結尾三四句詞云鳳舞團團餅恨分破教孤冷金
渠休淨隻輪慢碾玉塵光瑩湯響松風早減二分酒
病味濃香永醉鄉路成佳境恰如燈下故人萬里歸
來對影口不能言心下快活對省

茗溪漁隱

東坡詩春濃睡足午窓明想見新茶如潑乳又云新火
發茶乳此論皆得茶之正色矣至贈謙師點茶則云
忽驚午盞兔毫斑打作春甕鶯兒酒蓋用老杜詩鶯
兒黃似酒對酒愛鶯兒若是則色黃烏得為佳茗矣

今東坡全集不載此詩想自知其非故刪去之同上

臘茶出於建劍草茶盛於兩浙兩浙之品日注為第一
自景祐以後洪州雙井白芽漸盛近歲製作尤精囊
以紅紗不過一二兩以常茶十餘斤養之用辟暑濕
之氣其品遠出日注上遂為草茶第一茗溪漁隱曰
醉翁又有雙井茶詩云西江水清江石老石上生茶
如鳳爪窮臘不寒春氣早雙井芽生先百草白毛囊
以紅碧紗十斤茶養一斤芽長安富貴五侯家一啜

猶須三日誇蔡君謨好茗飲又精於藻鑒答程公闢
簡云向得雙井四兩其時人還未識叙謝不悉尋烹
治之色香味皆精好是為茗芽之冠非日注寶雲可
並也涪翁尤譽雙井蓋鄉物也李公擇有詩誚之戲
作解嘲云山芽落磴風回雪曾與尚書破睡米勿以
姬姜棄憔悴逢時瓦釜亦鳴雷又答黃冕仲索煎雙
井并簡王揚休詩云江夏無雙乃吾宗同舍頗似王
安豐能澆茗椀湔袂我風袂欲挹浮邱公吾宗落筆

賞幽事秋月下照澄江空
家山鷹爪是小草敢與拜
賜雲龍同不嫌水厄
幸來辱寒泉湯鼎聽松風

同上

世言團茶始於丁晉公前此未有也
慶厯中蔡君謨為福建漕使更製小團以充歲貢
元豐初年建州又製密雲龍以獻其品高於小團而其製益精矣
曾文韶所謂莆陽學士蓬萊仙製成月團飛上天又云密雲新樣尤可喜
名出元豐聖天子是也
唐陸羽茶經於建茶尚云未詳而當時獨貴陽羨茶
歲貢特盛茶山

居湖常二州之間修貢則兩守相會山椒有境會亭
基尚存盧全謝孟諫議茶詩云天子須嘗陽羨茶百
草不敢先開花是已然又云開緘宛見諫議面手閱
月團三百片則團茶已見於此當時李郢茶山貢焙
歌云蒸之馥馥香勝梅研膏轉動聲如雷茶神拜表
貢天子萬人爭喊春山摧觀研膏之句則知嘗為團
茶無疑自建茶入貢陽羨不復研膏祇謂之草茶而
已 葛常之

昨夜夢參寥師攜軸詩見過覺而記其飲茶兩句云寒
食清明都過了石泉槐火一時新夢中問火固新矣
泉何故新答曰俗以清明淘井當續成詩以記其事

東坡

詩話總龜後集卷三十

欽定四庫全書

詩話總龜後集卷三十一 宋 阮閱 撰

格致門

詩眼山谷言文章必謹布置每見後學多言以原道命意曲折後予以此槩考古人法度如贈韋見素詩云
紉袴不餓死儒冠多誤身此一篇立意故使人靜聽
而具陳之自甫昔少年日早充觀國賓致君堯舜上
再使風俗淳皆儒冠事業也自此意竟蕭條至蹭蹬

無縱鱗言誤身如此也則意舉而文備故已有是詩
矣然必言其所以贈韋者於是有厚愧真知之句所以
真知者謂傳誦其詩也然宰相職在薦賢不當徒愛
人而已士故不能無望故曰竊效貢公喜難甘原憲
貧果不能薦賢則去之可也故曰焉能心快快祗是
走踆踆又將去海而去秦也然其去也必有遲遲不
忍之意故曰尚怜終南山回首清渭濱則所知不可
以不別故曰常懷報一飢况懷辭大臣夫如此是可

以相忘於江湖之外雖見亦不可得而見矣故曰白
鷗沒浩蕩萬里誰能馴終焉此詩前賢錄為壓卷蓋
布置最得正體如官府甲第廳堂房室各有定處不
可亂也韓文公原道與書之堯典如此其他皆謂之
變體可也

曲水脩禊之會人各賦詩成兩篇者自右軍安石而下
纔十一人成一篇者郗曇虞悅而下十五人詩不成
罰觥者凡十六人今觀所傳詩數皆四言五言而又

兩類者兩四韻者無幾四言二韻正十六字耳當時
得預者往往皆知名士豈獻之輩終日不能措辭於
十六字哉切意古人持重自惜不欲率爾恐貽久遠
譏議不如不賦之為愈

黃常明

白獻晉公云聞說風情筋力在只如初破蔡州時雖叙
其功業與壽康其語緩而不迫此可為作詩法也

碧溪

省題詩自成一家非他詩比也首韻拘於見題則易於

牽合中聯縛於法律則易於駢對非若遊戲於烟雲
月露之形可以縱橫在我者也王昌齡錢起孟浩然
李商隱輩皆有詩名至於作省題詩則踈矣王昌齡
四時調玉燭詩云祥光長赫矣佳號得溫其錢起巨
魚縱大壑詩云方快吞舟意尤殊在藻嬉孟浩然騏
驎長鳴詩云逐逐懷良馭蕭蕭顧樂鳴李商隱桃李
無言詩云夭桃花正發穠李蕊方繁此等句兒童無
異以此知省題詩自成一家也

丹陽集

古辭云藁砧今何在山上復有山何當大刀頭破鏡飛
上天藁砧也謂夫也山上有山出也大刀頭刀上
鐫也破鏡言半月當還也此詩格非當時有釋之者
後人豈能曉哉古辭又云圍碁燒敗襖着子故依然
陸龜蒙皮日休固嘗擬之陸云旦日思雙履明時願
早諧皮云莫言春繭薄猶有萬重思是皆以下句釋
上句與藁砧異矣樂府解題以此格為風人詩取陳
詩以觀民風示不顯言之意至東坡無題詩云蓮子

擘開須見薏秋枰着盡更無碁破衫却有重縫處一飯何曾忘却匙是文與釋並見於一句中與風人詩

又小異矣

丹陽集

老杜歌行與長韻律詩後人莫及而蘇黃用韻下字用故事處亦古所未到晉宋間人造語題品絕妙今古

近世蘇黃帖題跋之類率用此法尤為要妙

呂氏童蒙訓

學退之不至李翱皇甫湜然翱湜之文足以窺測作文

用力處近世欲學詩則莫若先考江西諸派

呂氏童蒙訓

老杜歌行最見次第出入本末而東坡長句波瀾浩大
變化不測如作雅劇打猛顛入却打猛顛出也

呂氏
童蒙

訓

讀古詩十九首及曹子建詩如明月照高樓流光正
徘徊之類詩皆思深遠而有餘意言有盡而意無窮
也學者當以此等詩嘗自涵養自然下筆高妙

大槩學詩須以三百篇辭及漢魏間人詩為主方見古
人妙處自無齊梁間綺靡氣味也

少游過嶺後詩嚴重高古自成一家與舊作不同學者亦宜詳味文潛詩自然奇逸非他人可及如秋明樹外天客燈青映壁城角冷吟霜淺山寒帶水旱日早吹風川塢半夜雨卧冷五更秋之類迥出時流雖是天姿亦學可及學者若能常玩味此等語自然有變化處也

今人作詩自述則稱我謂人則稱君往往相習皆然杜子美送孔巢父詩云道甫問信今何如墜馬諸公携

酒相看詩云甫也諸侯老賓客遇王倚飲云在於甫
也何由羨則自述乃稱名送樊侍御云至尊方旰食
仗爾布嘉惠寄李太白云昔年有狂客號爾謫仙人
送竇九云非爾更持節何人符大名則謂人乃稱爾
若謂尊之甚則稱名則前三人皆非通貴之士若謂
卑則甚之稱爾則後三人皆非穉孺之列蓋其詩格
變態如是恐不繫重輕也

劬法門

退之心訝近來惟貯火眼知別後自添花臨川云髮為
感傷無翠掠眼從瞻望有玄花久欽江揔文才妙自
相虞翻骨相屯又云久詣郭璞言多驗老比顏含意
更踈韓我今罪重無歸望直去長安路八千永叔今
日始知予罪大夷陵去此更三千柳十年顚顚到秦
京誰料今為嶺外行王十年江海別常輕豈料今隨
寡嫂行柳直以踈慵招物議休將文字趁時名王直
以文章供潤色未應風月負登臨十一年前南渡客

四千里外北歸人又一身去國六千里萬死投荒十
二年蘇七千里外二毛人十八灘頭一葉身黃五更
歸夢三千里一日思親十二時皆不約而合句法使
然故也

黃常明

老杜雨詩云紫崖奔處黑白鳥去邊明而江碧鳥逾白
山青花欲燃之句似之贈王侍御云曉鶯工迸泪秋
月解傷神而感時花濺泪恨別鳥驚心之句似之殆
是同一機軸也

葛常之

劉義詩酷似玉川子而傳於世者二十七篇而已冰柱
雪車二詩雖作語奇怪然議論亦皆出於正也冰柱
詩云不為四時雨徒於道路成泥渣不為九江浪徒
能汨役天之涯雪車詩謂官家不知民餒寒盡驅牛
車盈道載屑玉載載欲何之秘藏深宮以御炎酷如
此等句亦有補於時與玉川月蝕詩稍相類

丹陽集

張籍云愛養無家客多傳得力方坡贈金山元老云蒜

山幸有閑田地招此無家客任居

葛常之

白云趣涼行逸竹引睡卧看書坡引睡文書信手番書引
睡魔誠人人所同也

葛常之

詩病門

學者須做有用文字不可盡力虛言有用文字所論文
字是也議論文字須以董仲舒劉向為主禮記周禮
及新序說苑之類皆當貫穿熟考則做一日便有一
日工夫近世文字如曾子固諸序尤須詳味學古人
文字須得短處如杜子美詩頗有近質野處如封主

簿親事不合詩之類是也東坡詩有汗漫處魯直詩有太新奇太巧處皆不可不知東坡詩如成都畫手開十眉楚山固多獷青者點而壽皆窮極思致出新意於法度之表前賢所未到然學者專力於此則亦失古人作詩之意

劉禹錫嘉話載楊祭酒贈項斯詩曰幾度見君詩句好今觀標格勝於詩平生不解藏人善到處相逢說項斯斯集中絕少佳句如晚春花云踈與香風會細將

泉影移別張籍云子城西並宅御水北同渠拙惡有
餘宜祭酒公謂標格勝於詩也祭酒乃敬之也其贈
斯詩鄙俗如此與斯亦奚遠哉

葛常之

樂府門

周美成為江寧府漂水令主簿之室有色而慧美成每
歎洽于尊席之間世有傳風流子詞蓋所寓意焉新
綠小池塘風簾動碎影舞斜陽

美一作見

金屋去來舊

時巢燕土花綠繞前度莓牆綉閣鳳帷深處許聽

得理絲簧欲說又休慮乖芳信未歌先噎愁轉清商
暗想新粧了開朱戶應自待月西廂最苦夢魂今宵
不到伊行問甚時却與傳音密耗痴將秦鏡偷換韓
香大便教人霎時廝見何妨新綠待月皆簿廳亭軒
之名也

俞義仲云

徐幹臣

仲

三衢人政和初以知音律為太常典樂出知

常州嘗自製轉調二郎神之詞云悶來彈鵲又攪碎
一簾花影謾試着春衫還思纖手薰徹金虬燼冷動

是愁端如何向但惟得新來多病嗟舊日沈腰如今
潘鬢怎堪臨鏡重省別時泪滴羅襟猶疑為我厭厭日
高慵起長託春醒未醒鴈足不來馬蹄難駐門掩一
亭芳景空佇立盡日欄杆倚遍晝長人靜既成會開
封戶李孝壽來牧吾郡李以嚴治京兆號李閻羅道
出郡下幹臣大合樂燕勞之喻羣娼令謳此詞必待
其間乃止娼如戒歌至三四李果詢之幹臣蹙頰云
某頃有一侍婢色藝冠絕前歲以亡室不容逐去今

聞在蘇州一兵官處屢遣信欲復來而今之主公靳
之感慨賦此詞中所叙多其書中語適有天幸公擁
麾于彼不審能為我致之否李云此甚不難可無慮
也既次無錫賓贊者請受謁次第李云郡官當至楓
橋橋距城十里而遠翌日艤舟其所官吏上下望風
股栗李一閱刺忽大怒云都監在法不許出城乃亦
至此使郡中萬一有火盜之虞豈不殆哉斥都監下
堦荷校送獄又數日取其供牘判奏字其家震惧求

援宛轉哀鳴致懇李笑云且還徐典樂之妾了來理
會兵官者解其指即日承命然後舍之

曾文肅子子寂鍾愛外祖空青公有壽詞云江南客家
有寧馨兒三世文章稱大手一門兄弟獨良眉籍甚
衆多推千里足來自渥洼池莫倚善題鸚鵡賦青山
須待健時歸不似傲當時其後外祖果以詞翰名世
可謂父子為知己也

揮塵錄

世傳溫公有西江月一詞今復得錦堂春云紅日遲遲

虛廊轉影槐陰迤邐西斜彩筆工夫難狀晚意烟霞
蝶尚不知春去漫遶幽砌尋花奈猛風過後縱有殘
紅飛向誰家始知青鬢無價歎飄零宦路往苒年華
今日笙歌叢裏特地咨嗟席上青衫濕透莫感舊何
止琵琶怎不教人見老多少離愁散在天涯
送劉貢父守維陽作長短句云平山欄檻倚晴空山色
有無中平山堂望江右諸山甚近或以謂永叔短視
故云山色有無中東坡笑之因賦快哉亭道其事云

東臯雜錄

長記平山堂上欹枕江南烟雨杳杳沒孤鴻認取醉
翁語山色有無中蓋山色有無中非烟雨不能然也

藝苑

方回詞有鴈後歸云巧剪合歡羅勝子釵頭春意翩翩
艷歌淺笑拜嫣然願郎宜此酒行樂駐華年未至文
園多病客幽襟悽斷堪怜舊遊夢挂碧雲邊人歸落
鴈後思發在花前山谷守當塗方回過焉人日席上
作也腔本臨江仙山谷以方回用薛道衡詩故易以


鴈後歸云唐劉餗傳記云隋薛道衡聘陳為人日詩
曰入春纔七日離家已二年南人嗤之及云人歸落
鴈後思發在花前乃曰名下無虛士

復齋漫錄

後山詩話謂退之以文為詩子瞻以詩為詞如教坊雷
大使之舞雖極天下之工要非本色余謂後山之言
過矣子瞻佳詞最多其間傑出者如大江東去浪淘
盡千古風流人物赤壁詞明月幾時有把酒問青天
中秋詞落日綉簾捲庭下水澄空快哉亭詞乳燕飛

華屋悄無人桐陰轉午初夏詞明月如霜好風如水
清景無限夜登燕子樓詞楚山脩竹如雲異材秀出
千林表詠笛詞玉骨那愁瘴霧冰肌自有仙風咏梅
詞東武南城新堤固漣漪初溢宴流杯亭詞冰肌玉
骨自清涼無汗夏夜詞有情風萬里卷潮來無情送
潮歸別參寥詞缺月挂疎桐漏斷人初靜秋夜詞霜
降水痕收淺碧鱗鱗露遠洲九日詞凡此十餘詞皆
絕去筆墨畦逕間直造古人不到處真可使人一唱

而三歎若謂以詩為詞是大不然子瞻自言平生不
善曲故間有不入腔處非盡如此后山乃比之教
坊雷大使舞是何每況愈下蓋其謬耳



詩話總龜後集卷三十一